



Luta Hamutuk

INSTITUTU BA PESQUIZA/INVESTIGASAUN, ADVOKASIA NO KAMPAÑA
Timor-Leste Institute for Research, Advocacy and Campaigns

Address: Rua Gov. Celestino da Silva-Farol, Aldeia Lirio, Suco Motael, Vera Cruz, Dili
Email Add: lutahamutuk.timorleste@gmail.com
PO. BOX: 1034, Correios, Dili, Timor-Leste
Tel: (+670) 332 2619 or (+670) 726 3783 & 724 3966

Termus da Referensia (TOR)

SEMINARIU NASIONAL

“Vantazen no Dezafiu Diversifikasaun Investimentu Fundu Petroliferu”

Introdusaun

Nudar pais foun ida iha kontinente asia sudoeste, Timor Leste koñesidu duni ho nasaun foun nebe iha riku soin Mina no Gas. Alein riku soin né, Timor Leste mos iha potencia rekursu minerais sira seluk nebe sidauk esplora mak hanesan; Marmer, Osan Mean no sst. Istoría hatudu ba ita katak iha tinan barak nia laran (Pasadu), riku-soin hirak né konsege sai malisan ba povu Timor rasik wanhira nasaun sira seluk komesa hatene no tau sira nia interese iha rai doben ida né, nebe povu Timor Leste rasik la sente katak sira iha riku-soin nebe mak suficiente hodi dezenvolve sira nia an. Iha era ukun rasik an ida né, Timor Leste nudar nasaun soberanu konserteza ita iha ona direitu atu deside no maneja rasik riku-soin hirak mak Timor Leste iha ba sustentabilidade moris povu tomak.

Atu halo mudansa ba povu nia moris hodi hetan kondisaun nebe mak diak no justu, estadu Timor Leste iha dever no responsabilidade tomak atu halo jestaun nebe Transparente, Akuntavel no Sustentavel ba riku-soin iha rai laran hodi dezenvolve povu nia moris ba kondisaun nebe ita hotu hakarak. Hodi halao jestaun no manajementu ba riku-soin minarai, hahu husi I Governu Konstitusional tó ba IV Governu Konstitusional halao ona investimentu Fundu Petroliferu iha rai laran liu husi Orsamentu Geral do Estadu nomos investimentu iha merkadu Finanseiru Internasional. Investimentu nebe mak durante né governu halao bazea ba Lei Fundu Petroliferu, nebe lei nee rasik lori estadu Timor Leste nia naran nudar nasaun nebe mak nia sistema no jestaun fundu minarai sai terseiru lugar iha mundu internasional.

Husi prosesu hirak né, Luta Hamutuk nudar instituisaun Peskiza, Monitoring no halo Adokasia ba asuntu Orsamentu Geral do Estadu no Fundu Minarai, konsidera katak, Investimentu nebe mak durante né governu Timor Leste halao

nudar meius importante atu maneja riku-soin minarai ba interese nasional. Tamba né durante tinan 5 nia laran, Luta Hamutuk mos mantein nafatin hodi tau matan ba lalaok Fundu Minarai, hodi nune riku-soi nebe mak ita iha fo duni benefisiu ba povu tomak no labele sai fali malisan ba futuru jersaun oin mai. Tamba né, atu garantia futuru jersaun oin mai, papel governu atu maneija riku-soin né importante tebes, nune futuru jersaun oin mai sei bele hetan mos benefisiu husi riku-soin hirak né.

Asuntu Petroleu liu-liu investimentu osan husi Mina no Gas sai kdasar no importante tebes ba dezenvolvimentu nasional RDTL. Hanesan ita hotu hatene katak kada tinan finanseiru, Orsamentu Geral do Estadu Timor Leste kuaze $\pm 80\%$ sei depende makas ba rendimentu Petroleu. Tanba né wainhira koalia konaba dezenvolvimentu nasional, asuntu Fundu Petroliferu sai asuntu importante atu diskute no dezenvolve ho prudente, transparante no akuntavel.

Inventus barak ona mak durante né Governu, Parlamentu Nasional no Sociedade Sivil sira halo relasiona ho asuntu investimentu Fundu Minarai, liu husi Seminar, Workshop no Diskusaun Publiku nebe involve peritus sira hodi hare liu ba sustentabilidade fundu minarai ba dezenvolvimentu nasional. Maibe husi inventus hirak né, seidauk hatudu didiak indikasaun forte katak Timor Leste presija halo diversifikasau ba investimentu nebe mak lao durante né. Maibe ita hotu hatene katak governu liu husi Mininteriu das Financas nebe mak responsabiliza jestaun investimentu Fundu Minarai, mantein nafatin hodi halo diversifikasaun ba Fundu Minarai tamba ho rajaun katak estrategia investimentu nebe mak Timor Leste uza durante né iha USA Treasury Bonds 90% no Equity 10% né konservativu no la razuavel ona wanhira akontese krize finanseiru global no retornu Investimentu Fundu Petroliferu ne'e la too ona ba Rendimentu Sustentavel Estimadu 3% .

Maibe iha parte balun, peritus sira mos hateten katak oinsa investimentu equity ho minimu 25%. Maibe seidauk iha estudu no esplikasaun detallu husi Ministeyru Financas karik ita opta diversifikasaun ba bonds iha moeda sira seluk. Tuir lei Fundo Petroliferu ba Equity 10% maibe too ohin lora seidauk aplika. Tamba sa mak ita la investe iha equity ba moedas sira hanesan: Japanes Yen, Australia dolar, Euro, no selseluk tan. Peritus balun mos la konkorda ho estrategia diversifikasaun nebe governu hakarak tamba, investimentu nebe mak halao dadaun ne'e to'o ohin lora diak liu ona no tipu investimentu ne'e mos la neseriu diak ba strategia futuru (*a successful policy in the past is not necessarily the right strategy*).

Asuntu mak sai preokupasaun no Dezafiu ba ita tuir diversifikasaun ba Investimentu Fundo Petroliferu bonds 90%. Investimentu ne'e tenke diversifika deit ba Equity ka bele diversifika mos iha Bonds ho moedas Japanes Yen, Australian dolar, Euro no sst. Karik ita hakarak investe iha Equity 10% ne'e (tuir Lei Fundo Petroliferu) haruka, ka Governu preziza esplika Plafonds risku ba tipu Investimentu Fundo Petroliferu ne'e, saida mak akontese ho investimentu ba

Fundo Petroliferu ne'e wainhira investimentu mak ita halo falla.

Tuir Luta Hamutuk nia observasaun ba prosesu hirak né, indika katak dezenvolimentu seitor minarai, liu-liu ba investimentu Fundu Petroliferu sei bele sai dezafiu iha futuru dezenvolvimentu nasional, wainhira governu Timor Leste nia estrategia investimentu seidak konvense didiak entidade hotu nia hanoin.

Atu kompriende diak liu tan Vantazen no Dezafiu sira ne'e, Luta Hamutuk iha iniciativa atu organiza Seminariu Nasional hodi halibur matenek nain sira atu bele esplika klean liu tan konaba: **Vantazen ho Dezafiu Diversifikasaun Investimentu Fundo Petroliferu**. Husi inventu ida ne'e bele halibur ideias no mos suporta politikamente atu hare Vantazen no Dezafiu ba estrategia investimentu ba Fundo Petroliferu nebe diak no hadok an husi risku nebe mak bele hamate sustentabilidade Fundo Petroliferu no bele lori Timor Leste ba iha dividas.

Aktividade né importante tebes tamba Governu bele esplika detallu liu tan, oinsa politika no estrategia hodi halo diversifikasaun ba investimentu Fundo Petroliferu. Hanesan mos husi parte Parlamentu Nasional bele mos ható Enkuadramentu Legal kona-ba Investimentu Fundo Petroliferu nian, prespektiva husi peritus balun kona-ba estrategia investimentu Fundo Petroliferu no mos prespektivas husi Luta Hamutuk rasik ba dezenvolvimentu iha seitor Mina no Gas iha Timor Leste, hodi garantia partisipasaun povu iha prosesu dezenvolvimentu nasional. Aprezentasaun Luta Hamutuk sei bazea ba rezultadu monitoramentu no peskiza durante né iha area Oil Transparency.

Objektivu

- Desenvolve espasu komunikasaun entre Lideransa Nasional, Autoridades Lokais, Sociedade Sivil no Akademiku kona-ba prosesu Diversifikasaun Investimentu Fundo Petroliferu.
- Desenvolve partisipasaun ema hotu nian ba prosesu dezenvolvimentu ekonomia liu husi investimentu Fundo Petroliferu.
- Atu lori ema sira nebe mak iha koñesementu, kapasidade no esperensia nebe diak konaba dezenvolvimentu Fundo Petroliferu hodi fahe sira nia matenek no esperensia mai ita.
- Atu rona no akompañã direktamente governu nia ideias, sugestaun no planu estrategia konaba Diversifikasaun Investimentu Fundo Petroliferu.
- Loke espasu ba debate publiku konaba Diversifikasuan Investimentu Fundo Petroliferu ne'e no mos buka atu hare lider comunidade sira nia preparasaun atu simu karik risku ba investimentu mak hetan falla ruma.

Fatin no Tempu

Seminariu Nasional né sei hala'o iha kapital Dili, loron **Tersa-feira, 4 de Maio de 2010**, iha *Salaun Koferencia Delta Nova* Dili, Seminar Nasional ida né sei hala'o ba loron ida nian, komesa hahu tuku 08:30 dader no sei ramata iha tuku 16:00 (*Estrutura ba Programa bele haré iha anexu*)

Abertura

Seminariu Nasional né sei aberta diretamente husi "**Sua Excelencia Presidente da Republica, Dr. Jose Manuel Ramos Horta**" {sei konfirma}.

Oradores no Topikú

1. **Sra. Emilia Pires, Ministra Das Finanças RDTL**, sei kolia kona-ba "*Politika Diversifikasaun Investimentu Fundo Petroliferu*"
2. **Sr. Abraão Fernandes de Vasconcelos, Direitur Geral Banku Pagamentu Autoridade Timor Leste (BPA)**, sei kolia kona ba "*Dezafiu Diversifikasaun Investimentu Fundo Petroliferu iha Merkado Finanseiru*"
3. **Sr. Manuel Tilman, Presidente Komisaun C Parlamentu Nasional**, sei koalia kona-ba "*Enkuadramentu legal ba Investimentu Fundo Petroliferu*"
4. **Sr. Mari Bim Amude Alkatiri, Eis Primeiru Ministru RDTL**, sei koalia kona-ba "*Estrategia Diversifikasaun Fundo Petroliferu*"
5. **Sr. Mericio Juvinal dos Reis, Direitur Luta Hamutuk**, sei koalia kona-ba "*Prespektiva Luta Hamutuk ba Investimentu Fundo Petroliferu*"

Target Partisipantes

Partisipantes mak sei partisipa iha Seminariu Nasional ida né hamutuk nain 150, kompostu husi entidade mak hanesan tuir mai né:

- Autoridades Lokal
- Membrus Parlamentu Nasional
- ONG's Nasional no Internasional
- Embaixadores, Australia, Indonesia, Portugal, Brasil, Malaysia, Cuba, UNI EROPA/EC
- Membrus Stakeholders EITI
- Ministeriu Planu e Finanças,
- Sekretariu Estado Rekursu Naturais.
- Autoridade Banku Pagamentu (BPA)
- Autoridade Nasional Petroleum (ANP)
- Membrus Konsellu Konsultivu Fundu Petroliferu (KKFP)
- Representantes Partidus Politikus.
- Representantes Relijioza
- Pontu Fokal Luta Hamutuk husi nivel Distritu
- Representante Universitarius.
- Media

Enseramentu

Programa ne'e importante ba ita hotu, ne'e duni Luta Hamutuk husu prezensa no partisipasaun ema hotu-hotu nia kolaborasaun atu halo susesa programa ida ne'e. Ami espera mos katak ho programa Seminariu Nasional ne'e sei fo korazem bo'ot ba Luta Hamutuk hodi atinzi objektivu prinsipais mak hanesan ami esplika ona iha inisiu.

Dili: 27 de Abril de 2010

Mericio Juvinal dos Reis
Diretur Eksekutivu Luta Hamutuk
(+670) 7263783

Seminariu Nasional

“Vantazen no Dezafiu Diversifikasaun Investimentu Fundo Petroliferu”

Estrutura Programa:

Tempu	Topikú	Oradores
08:30-09:00	Registrasaun	Komisaun Organizadora
09:00-09:25	Abertura Seminar Nasional	Sr. Dr. Manuel Jose Ramos Horta, Presidente da Republica, RDTL [<i>Sei konfirma</i>].
09:25-09:50	Politika Diversifikasaun Investimentu Fundo Petroliferu	Sra. Emilia Pires Ministra Das Finanças RDTL [<i>Sei konfirma</i>].
09:50-10:25	Dezafiu Diversifikasaun Investimentu Fundo Petroliferu iha Mercado Finanseira	Sr. Abraão Fernandes de Vasconselos Direitur Geral BPA [<i>Sei konfirma</i>].
10:25-10:55	Estrategia Diversifikasaun Investimentu Fundo Petroliferu	DR. Mari Bim Amude Alkatiri Eis Primeiru Ministru RDTL no Peritus Investimentu Fundo Petroliferu [<i>Sei konfirma</i>].
10:55-11:25	Enkuadramentu Legal investimentu Fundo Petroliferu	DR. Manuel Tilman Presidente Komisaun C Parlamentu Nasional [<i>Sei konfirma</i>].
	Prespektiva Luta Hamutuk ba Investimentu Fundo Petroliferu	Sr. Mericio Juvinal dos Reis Direitur Eksekutivu Luta- Hamutuk
11:25-11:40	Coffee Break	
11:40-12:45	Perguntas no Resposta	Moderador
12:45-13:45	Han Meudia no Deskansa	
13:45-14:45	Kontinua Perguntas no Respostas.	Moderador
14:45-15:00	Press Conference kona-ba Rezume Seminariu Nasional	Luta Hamutuk
15:00-15:30	Coffee break	
15:30-16:00	Enseramento	Luta Hamutuk